

雒
閩
源
流
錄

雒閩源流錄序

壬戌冬孟子始得登東林
講堂瞻拜道南諸先賢神
位若啓若翌如在如承徘徊
不能去旣解維猶罨思

高望惻然其有失也不踰
月秋紹張先生不我遐棄
惠示以手纂雒閩源流錄
反覆玩味至臘底始卒業
充然有得不覺喟然歎興

曰嗟乎前代人物之盛萃
於斯千古理學之傳辨於
斯矣予弱冠卽喜觀雜聞
諸書然未定所宗中更爲
陸楊陳王諸說所淆亂故

歷壯強以至艾耆浸淫老
釋沉溺文詞與流俗人無
異近始返我彝好專主紫
陽寔繇幸獲高子遺書沉
潛紬繹復綜考幾亭少墟

涇陽整菴諸先生辨論鑿
鑿然別黑白而定一尊因
縱觀近儒所輯或正閏
收或真僞相雜名爲表揚
理學而大義未明微言孰

晰惜也不如其已以故兀
兀窮年嘿無著述行與草
木同腐環顧門弟子大都
以舉業爲重尙未見有尋
原反本以先聖絕學析疑

問難推後大傳者此予所以私憂也惟我秋紹先生學有本原接武東林久以明道爲已任蒐輯雖詳而必歸之一辨論甚簡而已

極其精論學以踐履爲驗
故名節政治與議論俱存
論人以篤實爲根故高曠
圓通與虛寂並黜誠可爲
先儒之集成後學之宗主

矣予尤羨其及門婺源黃
氏康謠若思庭友庭直庭
獻諸兄弟親師論學尊聞
行知恐此書之流傳不廣
浸久失真而亟爲梓行以

公諸當世且康謠嘗著省
過箴庭友亦有立志說豈
惟篤信師說抑將身體而
力踐之此真程朱門下之
所敬而取也予故樂觀厥

成而爲之序以告世之從
事著述與夫講爲師弟子
者

時

康熙二十一年壬戌冬杪

葑溪志矩老人彭瓏述

於信好齋

雒閩源流錄序

孔子曰道之將行也與命也道
之將廢也與命也若是乎道有
行有廢惟聽乎天而已然儀封
人謂天將以夫子為木鐸孟子
叙道統以孔子繼堯舜湯文之

後不聞以有德無位為疑朱子
集註附載伊川贊明道之詞亦
不稍自嫌者何耶愚嘗思之孔
孟之道不行於春秋於戰國而
見尊於漢然後歷代因之程朱
之道亦不用於汴宋於南宋及

理宗始一表章之至故明遂力
崇之後之論治者謂西京盛經
術東京尚節義繇孔孟可也謂
勝國一代人材風俗之美繇程
朱可也蓋廢者道之暫命之變
行者道之常命之正君子所以

屈一日而伸萬世也繇斯以言
凡人君尊用聖賢之道用建治
統其道協二帝三王之道其治
成唐虞三代之治即當世臣民
遵之者為正經背之者為邪曲
固不待言而判矣故明之初朝

廷宗程朱以法孔孟馴致太平
乃弘正以還畸人立幟異喙爭
鳴日以掊程擊朱為事宇內一
二正儒非不明距其失而貞不
勝邪雖吾新安人士世守三夫
子之書至是亦盡棄其學從風

而靡載在往牒良可怪嘆既而
小往大來東林起南關中起北
異地同符而吾鄉少原余先生
暨登原汪先生出而應之遂與
顧端文高忠憲馮恭定諸先生
麗澤講習周旋朝野砥柱中流

凡所以破異端似是之非撤後
學異同之蔽者務盡其心不遺
餘力一時學者得受正學弗迷
所往之數君子者實大有功焉
顧數君子議論散見於語錄書
問皆隨物造端所發明者及一

人一事而止未嘗彙顙諸儒爲
之折衷叙正故其論卒未有定
自哲人日遠典籍散亡而諸好
異趨新之徒久伏思發相與棄
間抵隙陽合陰判以芽禍於其
間閱今數十年邪說又作其更

改回護之術矯假牽合之詞且
弥工而彌熾也恭遇

聖朝大啟斯文闡明道揆申飭學

宮誦法朱註特錄二程後人世
官翰林所以廣風勵寓匡直者
視舊加彪上令下從亦已風草

乃上之彛訓雖明在是而下之
率由恐不盡然余友錫山張菰
川先生惄然憂之於是網羅一
代研討十年著雒閩源流錄十
七卷其書上稽洪建下訖啟禎
別派分門不羗毫髮將以扶王

道正人倫翼聖真解愚惑用意
良至誠今日不可少之書也聲
諧不敏嘗與於紫陽講會獲聆
六邑名賢緒論沿閩溯雒略識
原委惜汨沒辭章未有所聞年
來養病斗室輒檢先儒格言以

當良藥會兒曹寓京江從先生
游受讀是錄承命寄余山中一
展玩間舊疑頓豁中心躍如者
久之竊念東林紫陽道義之交
其來有自今先生繼起顧高任
重道遠樹立卓然而吾儕雖庸

駑幸得師資遇鞭策而不克奮
興於學非夫也可不勉乎且吾
聞之雨未至礎先潤是錄行即
邪熄正著而孔孟程朱之道益
大行世益大治天兆之矣書此
以勵子姪併諭同志而正之菰

川先生

省

康熙歲次壬戌七月既望婺源江
後學餘庵黃聲諧謹序

雒閩源流錄自序

嗚呼世之儒者逞逞陽儒陰釋以進釋退
儒始而薄程朱繼而卑孔孟繇是道術凌
雜世教日衰然則何以正之亦正之以儒
而已孔孟其儒之始祖乎程朱其儒之大
宗乎是故欲正之以孔孟不若卽正之以
程朱欲正之以程朱不若卽正之以學程

朱之真儒嘗取宋明儒派合叅之宋人之
爭衡程朱者前有王蘇後有張陸皆禪學
也彼安石父子之篡祀由京卞借名競黨
龜山出而一疏斥去公論昭然其蘇學亦
祇行于北而程學盛行於南不以學禁稍
沮朱子因之錄伊雒淵源固易辨也橫浦
稱能正色立朝其得表章以史衛王報舊

知特請於上史敗而聲迹旋湮象山著荆
門軍之政其徒尊之乞易名置祠尙援濂
洛爲重要亦非溢數吾朱子雖嘗三黜乎
歿未幾而賜謚文旋與周張二程並躋文
廡所著諸書亦皆通行而後人爲錄考亭
淵源在宋史旣成道學有傳之後又易辨
也明儒之變派則異是當其初孝陵首正

道揆金華之傳來散紫陽之教增新故台
海挺立大節澠池篤勵躬行河津標復性
之宗泉南啟主一之鑰其揆一也自陳王
倡異而其徒決裂太甚隱恠有述設邪生
心一時講壇徧地絃誦徹天問之則皆講
新學伐程朱者名爲道席之極盛實當道
席之極亂時則有若餘干蘭谿虛齋二泉

諸先生皆以醇儒守先待後而泰和三辨
王學高陵出甘泉之門不徇其說莊渠旣
焚毀達摩遺跡又按剔慈湖禍根三先生
者尤持論鑿鑿大有匡維然至隆萬間屢
議廡祀先薛繼陳繼王而胡僅得末附竟
如晉楚分歃蔡衛爭長非閏位之奪正乎
旣而東林鼎建載顧高兩夫子並作一提

性善以破無善一主格物以救空知辨析
絲毫庶幾障川東流俾夜復旦乃爲謫籍
孤臣未免聯席倉皇異同回互尋罹璫禍
身隕節完而恩賙之後復以牽連黨議未
滿謫史極於南遷尙爲口實嗟乎生不逢
崇政坐講之儀結垂拱延和三召之契沒
未膺淳佑從祀之典亦不聞有靖康明詔

淳熙正議釐革乎其間吾道窮矣大抵朱
儒之道多阻抑於小人害尙淺故其名先
晦後顯明儒之道先掩蝕於新學害尤深
故其實雖存若亡學者居今日而尙論前
人或聞其名未覩其實或習其言未考其
行苟無記錄何以詳驗本末始終而知其
爲足以砥衰還盛也乎況邪慝流殃設吾

黨不早論定得無有紊亂先型以迷惑後
生者乎此雜聞源流一錄夏之所以不得
已而作也惟是禪學者流不難掃除六經
其見吾錄必有掩耳閉目走匿不欲讀者
否則有倡爲不必分辨之說以調停異徒
者又其甚非病以方人卽詆爲偏黨欲箝
吾口而掣吾筆將若之何雖然吾不敢以

此量天下士也斯錄也非吾之私言也一代真儒學程朱以學孔孟者之公言也賢者起而或有取焉則於道術之歸一世教之復興未必無少助安敢逆料其無益而竟置之哉

皆

康熙壬戌仲春月吉錫山後學張夏書於

西津書舍

按刻雒閩源流錄題後

雒閩源流錄者吾師菰川張夫子所錄故
明諸儒學案也衢僻處山陬愚鈍失學自
巳未歲幸樞衣門牆蒙指授經傳義理及
爲學次序諄諄不倦從此惕然知警猶未
得門而入也越三年而吾師出是錄令讀
且命按警衢再拜受教旣卒讀循環三復

撫卷歎曰是錄寔繼伊雒淵源而作吾師之心其卽朱子之心矣乎竊聞之孔孟之道至濂雒而復著而伊雒之學至南渡後而漸畸或捭其外或竄其中所謂海內學術之弊只有江西頓悟永康事功二端而中間掩覆推遷更有萬難徵詰者我朱子錄伊雒淵源以正之何其謹嚴也自此以

後黃蔡親承之真魏續肩之迨由宋入元
而王何金許遞衍之於是雒閩一燈顯於
明初號爲統一廼曾未百載而異學繁興
侈然欲悉祧宋儒而直禰孔子卽曾孟亦
若在所不屑旣而理窮辭遁則又岐程朱
而二之曰朱失程意且岐二程而二之曰
伊川戾於明道不及遠甚噫竟判閩於雒

而絕維閫于洙泗矣幸而天佑斯文正儒迭起相與大聲疾呼竭力匡救若洙水之橫決賴有隄障不至陸沉顧僞風易滋新說久熾貞邪參互無所折衷加以俗情惑人調停失衡姑息養患沿至今日而聚訟者尙未有定也不有君子爲之疏清剔穢世之學者何由因朱以求程因程朱以上

求孔孟也哉今觀錄中以雒閩爲宗主而
標儒宗以示準的次時代以鏡盛衰分支
派以定正閩俾後學一覽廓然至于立言
之際和而不同辨而有體非心朱子之心
者不能爲而語其功宜亦有追配焉者矣
蓋吾師隱居抱道嗣席東林得先正顧高
諸君子之傳所以有此衢不敏竊謂是錄

關係道脉不可不公諸同志爰率諸弟捐
橐授之梓比告竣遂不揣卑庸僭題末簡
自識其心悅誠服之意若夫儒先闡奧與
吾師敘論大義微言闡揚曷罄有諸先生
之弁敘在小子何敢贅焉

峇

康熙壬戌季秋月朔婺源門人黃昌衡百

頓首書於京江光霽樓

凡例 二十二則

一朱子伊雒淵源錄爲程子作也謝方石氏伊雒淵源續錄爲朱子作也及立齋宋氏方山薛氏各著考亭淵源錄取名尤顯切具列考亭友徒而宋儒大備矣厥後少墟馮氏集元儒百人題更名元儒攷畧豈元人於雒源有不盡合者乎今夏僭不自量私纂故明一代諸儒學行梗概遡統程朱故題曰雒閩源流錄蓋爲程朱後人作也

一採集諸儒自洪武初年起至崇禎末年止間有

一二稍遲歲月而以志節終者於篇末特存之
其後此賢哲自當別爲記載不敢贅入錄中

一元儒考畧大書十八人細注八十二人名下標
附字今稍變其法俱用大書惟分爲三品最上
爲正宗傳中稱先生得十六人其次爲羽翼稱
字得四十七人皆頂格書之又其次爲儒林亦
稱字幾及三百人下一格書之偶有非正宗而
關係師友淵源者亦稱先生在儒林旣下一格
在羽翼則於目錄下不標先生字以別之固無
嫌於同辭也

一朱子原錄祇錄見成文字謝氏續錄亦採宋史道學儒林二傳及取行狀語錄合成之馮氏攷畧則每人立一小傳體裁異矣是錄雖皆原本舊文而當羣言淆亂之餘不得不稍施筆削用寓微意亦每人立傳而間附遺事剩語意在參二錄考畧之長愧未逮也

一錄前有總目表見大凡其每卷之首又各分載目錄以便簡閱

一傳首書姓名傳中或稱字號或稱先生以出自學者之筆不敢僭擬史法也

一書地書官悉沿舊名不參 新制亦論世之法

當然耳

一先後依歷朝時序併畧照科目年分或有以師生授受連書之者不至年世懸絕惟陳王兩家之學恐混列無辨另分江門一卷姚江三卷編次於後

一偶有鄙見或綴于卷端或散見錄中聊抒一得之愚徐俟百世之論安能與時賢聚訟耶極知狂妄僭踰無所逃罪然亦有不得已於斯者矣一駭學自當以躬行爲主顧各家子孫行狀與夫

山人游客乞米之傳諛墓之文所難輕徇今此
總以出處去就死生義利人倫大節爲斷及詳
考今昔字內公評始入之

一建文末附靖難諸人嘉靖間附議禮諸人暨其
時手撰青詞而托於寓諷意與不用道家語者
皆盡失儒者本色故悉芟之

一聖賢正終曳杖易簣萬古爲法乃後儒臨歿有
荷奇作怪類坐化飛昇之跡者非邪妄而獨據
傳中一字沾染必屏不錄

一正宗十六先生朝野久有公論擬進廡位所宜

詳慎訂正敬軒整庵兩先生傳旣折衷高子遺
書餘皆讀全集叅諸錄詮次爲編而正學月川
敬齋涇野涇陽景逸六先生尤私心宗法易稿
至數番始定雖淺薄不足測海窺天而傳中具
有步驟曲折亦與同志者之細讀有所證入也
一傳文寧隱過無掩善如於許存仁不書以象牙
飾牀語於朱楓林不書不辨宮徵事爲賢者諱
也如何粹夫面數永嘉十三愆鄭環浦與華亭
力爭姚江從祀文獻錄皆不著仍檢志傳補之
表其大也此類不能悉數觀者叅按他書自見

至若呂新吾之刻閨範本無邪心史玉池之救
臺臣非爲中立惟書其寔以俟公論倘繩以前
時門戶之說吾寧受過矣

一孔門文學子游子夏皆聞道者也故明文人若
李何若七子則有文無學李崆峒旣負濠累後
見莊渠自悔不學年已老矣王鳳洲居喪執禮
三年後始茹葷御室十年後始具衣冠與燕會
居無姬侍家無優樂嘗請釐文廟配享綽有儒
風而自言讀書萬卷未嘗從六經人以講學者
爲可耻終未化雒蜀之見王守溪中年作明理

克已二箴晚益純明著性氣辨上講學親政二篇而躬歷相位不能任道歸震川與聞莊渠之緒觀所爲浙東儒派策問未及討究真源特文人之出色者耳他如郝京山定九經瞿慕川論中庸併撰述諸書二子皆竄名儒林然余聞京山自垣中謫令江陰頗失廉譽慕川又始終依托權門言有枝葉何足道乎下此艾東鄉立言正而有遺行張西銘著書博而落塵網去道逾遠是錄所採文學之儒前惟潛溪華川後惟西原后渠稚川五家而已

一從來人品自人品學術自學術如近世北直趙忠毅楚中楊忠烈吾鄉繆文貞李忠毅諸君子氣節甚高嘗往來東林而或邊幅不修或儒墨未辨列在忠臣傳自覺生色入之儒林中得無反見病乎不寧惟是武塘魏忠節親遊高子之門當赴逮時著有高橋別語猶闕而不書他可推矣雖然有品者未必皆有學而無品者其學必非真故愚爲是錄遇學醇品正與品正學偏者並錄之而微辨之遇言學可聽而人品有玷者竟削去不敢寬假爲之出脫其學品俱瑕者

又無論焉

一陳莊王湛品正學偏君子爲吾道辨之則是小人以私意毀之則非當時秉鈞軸而惡陳莊王欲罪王文成者皆儼然自命爲大儒而忌賢害正不自知其墮入下流況平日出處卑污議論詭僻躬負種種悖戾又可使薰蕕同器乎是錄雖力辨陳王而陳王在所必存雖節取正論而丘氏張桂槩不之錄此稟孔門家法非敢意爲進退也

一諸儒有合傳者有附傳者俱於目錄之下注明

姓氏或門人子弟一節附見者則畧而弗注
一陳學近正不妨寬收王學泛濫已極謹擇而書
之尙嫌其合少離多從別論可也有能救正陳
王不悖程朱者亦進諸羽翼之列僅得八人說
見卷中

一是錄始於壬子春成于辛酉冬初承同邑彙旃
高先生出示所著三楚文獻錄得採十之一繼
承休寧啟我汪先生寄示明儒通考目錄四卷
得採十之二蒙益良多而亦不敢蹈勦襲雷同
之弊非立異也爲書體裁各有攸宜也

一朱子嘗爲周程張邵司馬六君子贊及錄伊雒淵源獨遺涑水是嚴於辨學處然後來遞進六子於文廡竟以六贊爲據矣至謝氏續錄後敘中惓惓於杜清獻車玉峰兩公而遺魏鶴山馮氏攷畧亦遺汪文烈潘陽節先正當有主見後生未敢遽議今以夏之寡陋掛漏宜多年來頗事梭輯固有向擅儒名及購讀本傳無關問學如某某者至如朱以功馮忠齋龔端恪劉文正諸先生曾窺語錄著述一斑知其所學合正而朱馮龔誌傳無考記文正事者多異辭亦遂闕

疑誠是錄之憾也況當老成半謝離索成愆中
間出入品第有未及商改者補遺訂誤統以俟
當世大君子倘能早賜是正幸莫大焉

一傳末附載今昔名家評論以資發明或舉姓名
或稱字號或標書目皆隨筆屬詞有一人而兼
後姝稱者初不以是寓軒輊觀者諒之

康熙壬戌孟陬十二日錫山後學張夏謹識於川
上之樹人堂

閩源流錄總目

正宗羽翼各注二字
餘皆儒林不及詳注

卷之一

錢唐翼

許存仁翼

葉儀

何壽開附

范祖幹

汪壽五附

唐懷德

胡翰

陶安

翼

陳遇

朱升

子高附

汪克寬

趙汭

翼

汪仲魯

宋濂

翼

曾魯

孫大雅

王禕

子

卷之二

吳海

翼

劉宗道

余應

梁竑

翼

陳謨

翼

張九韶

張存

解開

何英

郭楨

翼

桂彥良

翼

范準

李仕魯

謝應芳

華宗韓

傅淳

朱右

方克勤

趙謙

金固

方孝孺

正宗

王叔英

周是修

卓敬

程本立

胡子昭

林嘉猷

鄭智舍傳

俞貞木

卷之三

曹

端

正宗李德附

郭容

倪峻

李時勉

陳敬宗

楊鼎

尤文

羽翼

吳訥

彭勛

薛瑄

正宗

閻禹錫

張鼎

喬縉

李杲

衛述

楊壘附

張傑

劉誠

卷之四

段堅

羽翼

王鴻儒

張景純附

周蕙

薛敬之

王爵

李錦

羣人

劉觀

翼

夏寅

何喬新

吳與弼

翼

鄭伉

謝復

婁諒

任泰

陳真晟

正宗

彭韶

李宗栻

楊守陳

翼

楊守陟

卷之五

胡居仁

正宗

余祐

夏尙樸

陳廷

翼

張元禎

羽翼

姚文灝

張銳

羅僑

謝鐸

翼

羅倫

翼

劉彬

何星

史英 吾學 王啟 周瑛翼

丁璣 周孟中 鄒智鍾附 陳騏

宋端儀

卷之六

章懋正崇 程昌 黃傳 應璋

董遵 陸震 凌瀚 章拯

黃仲昭 張吉翼 李汰 邵珪

王雲鳳翼 蔡清正崇 陳琛林密林希元附 邵寶正崇

楊廉 談縉 張綬 陳鳳梧

邵清 劉玉 楊文

卷之七

羅欽順

正宗

王承裕

汪循

徐問

汪禔

張邦奇

胡鐸

羽翼

馬卿

樊淡

魏技

正宗

王敬臣

金洲

韓邦奇

羽翼

韓邦靖

張岳

沈霽

卷之八

呂枬

正宗

崔銑

馬理

舒芬

祁勅

薛蕙

王思

鄭佐

劉瑞

何璿

羽翼

華金

李錦

傳聞人

周滿

呂潛

郭郭

張前李後

王材

羽翼

卷之九

金賁亨

羽翼
陳洪漢附

朱裳

張芝

寇天敘

曹淡

李中

撤大經

吳稷

呂賢

毛憲

胡明庶

俞明齋附

楊爵

羽翼

楊繼盛

羽翼

柯維祺

羽翼

葉夔

高璣

薛應旂

王燁

吳汝憲

華甫附

陳建

卷之十

鄭世威

羽翼

吳文光

張基

周思兼

萬思謙

陰秉衡

謝憲

王樵

羽翼

李經綸

唐音
溫純

王之士

章潢

鄧元錫

束桓

朱鴻謨

范涑

呂坤

余啟元

徐三重

卷之十一

顧憲成

正宗

顧允成

馮子咸

錢一本

正宗

陳幼學

于孔兼

羽翼

史孟麟

王述古

薛敷教

孫纘宗

陸禹定

劉元珍

張納陞

馮應京

何棟如筆
經附

安希范

許世卿合
傳

程汝繼

吳從周

吳正志

張維機

卷之十二

高攀龍

正宗

馮從吾

正宗

葉茂才

張夢時

余懋衡

羽異從兄懋交附

汪應蛟

堵維常

詹時明

曹于汴

吳桂森

羽異

鄒期楨

羽異第期相附

陳仁錫

孫承宗

鹿善繼附

秦爾載

江旭奇

張雲鸞

李呈芬

朱蘊奇

張本德附

卷之十三

金鉉

正宗

洪德常

張采

朱之馮

馬世奇

俞汝楫

江世育

黃廣

江彥明

李奇玉

宿夢鯉

秦重泰附

丁明俊

陳龍正

羽異

卞子靜

黃淳耀

夏鑒校附

陶琰

華允誠

羽異兄九錄合傳

吳鍾巒

右一卷至十三卷正宗十六人羽翼三十九人儒
林一百九十二人併合傳附傳共二百五十餘人

卷之十四

江門

陳獻章

翼

莊

景

翼

賀

欽

翼

陳茂烈

翼

李承箕

兄弟芳合傳

陳

庸

張

詡

林光

李孔修

謝

佑

何廷矩

湛若水

區越

梁

儲

丁

積

朱伯騏

馮裕

方重杰

何維栢

霍

任

唐伯元

劉秉鑑

洪

垣

方

壘

謝顯

潘子嘉

汪尙寧

鄭

燭

林挺春

郭 棐

鍾景春

蔡 鏞

顧應祥

韋商臣

唐 樞

許孚遠

王 愛

卷之十五

姚江一

王守仁

鄒守益

翼

季 本

徐 愛

魏良弼

第良政等附

陸 澄

王 潼

徐 樾

唐愈賢

歐陽德

穆孔暉

南大吉

第廷吉附

王 道

路 迎

馮 恩

歐陽瑜

劉 陽

劉 魁

周 衝

梁 焯

蔣 信

劉文敏

劉邦采

黃弘綱

何廷仁 朱得之

卷之十六 姚江二

羅洪先翼 胡瀚 劉 淵 尤時熙翼

薛 甲 張 縻 游震得尊得附 余世儒

周 怡 張 緒 來知德 孫應鰲

余時英 萬 吉 王漸逵 殷士望

詹一麟 查 鐸 胡大賓 劉 週

卷之十七 姚江三

李 材余宗濬附 朱英髡 賀時泰 辛 全

張後覺王牧等附 孟 秋 張元汴 孟化鯉翼

劉元卿

李天植

鄒元標

方大鎮

孫慎行

施弘猷

蕭自麓

陸森明附

笄繼良

呂維祺

蔡懋德

劉宗周

黃道周

右十四卷至十七卷正宗缺羽翼八人儒林九十
五人併合傳附傳共一百一十餘人通前總計正
宗十六人羽翼四十七人儒林二百八十七人共
三百五十二傳三百六十餘人

卷之十八 補編一

朱善 孔克表 王沂 許繼

程通 黃寬 林雍 胡九韶

車泰 饒烈 趙復 張廷芳

金道寓 金道器 趙珪 吳宗周

潘府 劉閔 王廷相 黃輦

徐灝 張璿 李楷 何唐

冀鍊 嚴紘 蔡元偉 陳交

王宗聖 宋効周 楊應詔

卷之十九 補編二

楊道會

許象先

王獻蓋

鄭守道

沈亨

倪復

張淇

吳中立

方學漸

鄒觀光

蘇濬

吳瑞登

陳朝棟

劉覲文

洪猷

王任重

薛敷政

王永圖

余玉節

卓椿

汪康謠

子鼎和附

熊祚延

劉理順

李邦華

郭正中

戴思孝

儲漣

右補編儒林二卷共計五十八人通前共計十九

卷四百十餘傳四百二十餘人

雒閩源流錄卷一

無錫張夏纂 門人婺源黃昌德校

自孔子而上道統在上若舜臯賡歌湯尹一德文
有望散武有旦奭君若臣任之而其下不與焉自
孔子而下道統在下若思孟迭傳以訖濂雒關閩
師若弟任之而其上不與焉彼漢唐宋元諸君大
率以詐力取天下以法術守之其所學不出黃老
申韓及文章技藝之末而已惟故明太祖之興也
天縱聖神重闢區夏方舉兵擾攘中卽孜孜訪求
真儒延見請益每有宣諭必暗合詩書廻出腐生

章句之表旣登大寶詔天下有能傳朱學者所在
有司以聞於是立國則以仁義爲本治世則以教
化爲先凡議禮制度考文之事莫不本身徵民準
今酌古與諸儒從容面議詳求至善旣定而後籍
之孰謂堯舜禹湯文武之統逾越二三千年不復
見於上乎此誠帝而儒者第帝紀列傳不同裁茲
錄不敢遽述學者別考之前史本紀可矣嗟乎人
所疑於高廟者謂其剛明有餘喜怒不測晚年偏
任名法殺戮過多似亦未免褊霸耳以管見竊言
之如得許存仁而歎相見何晚夢卜之遺風也聘

陳遇而稱中行先生莘渭之盛舉也聽陶安李習
而定鼎金陵夏后之鼓鐘磬鐸也引朱濂王禕輩
問對殿廷虞廷之都兪吁咈也定取士制而主四
書五經尼山之贊修刪定而卽周禮之三物賓興
也設教民榜而申大誥六言放勲之勞來匡直而
亦木鐸之誨人不倦也諸如尊崇孔廟頒行朱註
感錢唐諫而仍祀孟子從楊砥請而罷祀楊雄等
純乎其爲王道以用人則惟已以改過則不吝所
以當其時大正學術蔚起儒風晚識方正學於少
壯更拔諸囚伍中許爲莊士俾輔後人卒捐十族

峻士君子義利之防培三百年綱常之氣後來北
狩南巡議大禮諍國本遇一事變必有死臣爲國
生色皆方先生導之也而孰非太祖之所貽也哉
當天啓時關中馮從吾氏嘗疏稱本朝以理學開
國良爲確論夏草野書生固不辨菽麥輒敢表而
揭之以附於飲水思源之義今錄洪武建文兩朝
儒者得四十餘人分爲二卷雖隱見不同大抵生
本元餘遠續宋派爲明祖作養而出者也其承傳
脉絡自具各傳中觀者詳焉

錢唐

許存仁

葉儀

何壽朋附

范祖幹

黃立附

唐懷德

胡翰

陶安

陳遇

朱升

子同附

汪克寬

趙汭

汪仲魯

宋濂

曾魯

孫大雅

王禕

子紳附

錢唐字惟明浙江象山人博學敦行才氣尤高元末隱山谷明太祖登極惟明年將六十應詔赴京敷陳王道裁正禮樂超拜刑部尚書召講書經二典三謨陞立而對有糾其草野不知君臣禮者惟明正色曰以古聖聖之言陳於陛下不跪不爲倨嘗諫宮中不宜揭武后圖忤旨待罪午門外至日晏上悟命賜飯立撤其圖上將以孔子釋奠止令行於曲阜京師天下不必通祀惟明

上疏諫曰孔子百王宗師先儒謂仲尼以萬世爲逢故
天下祀孔子如祝聖壽報本之禮不可廢也令遂止洪
武三年上讀孟子至土芥寇讐之說大不然之議欲去
其配享詔敢諫者罪以不敬且命金吾射之廷臣莫能
發一言惟明獨抗疏入諫輿觀自隨袒胸當箭曰臣得
爲孟軻死死有餘榮上見其誠懇立命太醫院療其箭
瘡越明年上下詔曰我聽得孟子辨異端闢邪說發明
先聖之道今後依還祭祀於是孟子配享得不廢由惟
明死諫之力也厥後上更命儒臣修孟子節文惟明以
耳聵乞歸尋謫壽州卒惟明爲人秉心如丹故諫諍目

矢石不懼閑衛吾道功存孔孟蓋千年來一人而已按

漢之稱福首請封孔子之後而成帝從之歷代因之說者尚推其功以爲當侑享文廟今觀惟明先生于雷霆觸金矢以死諫全孟祀無論明廷當日未見其爵自漢宋以來諸儒尊師衛道多不恤禍患未有以身殉之若是勇且誠者也蓋其尊孟子卽所以尊孔子况嘗上疏請天下通祀先聖及立講二典三讓正大之識高明之氣事事不可及耶此固孟門之季路而昌黎之同心也論明儒從祀者必當首列之矣

許存仁名元以字行浙江金華人大父謙學於仁山金氏得朱子之傳世所稱白雲先生者也元末明祖初起幸金華訪求其後召存仁未至而乘輿已還乃驛赴金陵一見輿語大悅曰何相見之晚也拜京學教授仍命入傳皇太子及諸王歲乙巳九月始置國子學命爲博

士丙午五月上發濠梁省陵墓命從行八月奉命進講
經史極陳洪範休徵咎徵之應上悅吳元年四月上至
白虎殿見諸子有讀孟子者問曰孟子何言爲要對曰
勸國君以行王道施仁政省刑罰薄稅斂乃其要也多
十月定國子學官制卽擢爲祭酒最見禮遇出入兩宮
且垂十年自稽古禮文之事至於人才進退時政張弛
無不預議及設立教國子條例數十事皆見施行會存
仁嘗以學宮什器用諸私室言官以移用官物坐之章
入上覽之笑而已旣而浙江僉事程孔昭誣劾其過失
乃詔勿治安置韶州後遇赦還尋卒其在韶卽張文獻

公祠以居好事者繪爲南華謫居圖傳玩之存仁恪守
家教一宗朱氏非五經四書不讀非濂洛關閩之學不
講遭遇高廟特簡爲一朝國子祭酒稱首天下士翕然
向風說者謂明初學脉之正實原於此

葉儀字景翰浙江金華人元末受學於許白雲先生
先生語以學者必以五經爲本以開明心術變化氣
質爲先景翰朝夕惕勵研究奧旨久之授徒講學士
爭趨焉其語學者曰聖賢言行盡於六經四書其微
詞奧義則近世先儒之說備矣由其言以求其心涵
泳從容久自得之不可先立己意而妄有是非也王

師下金華名爲五經師辭疾不就隱居養親以終其身邑人吳沉稱其理明識精一介不苟安貧樂道死而不變所著書曰南陽襟稿門人何壽朋字德齡蘭谿人洪武初舉孝廉以二親俱老辭父沒舍所居宅易地以葬居恒窮理守道不妄干人晚自號歸全學者稱歸全先生

范祖幹字景先浙江金華人元末受業白雲先生之門悉得其旨趣其學以誠意爲主而嚴之以慎獨篤之以固執引誘學者惓惓真切惟恐其不入於善四方士大夫嘗問安否以卜斯文興喪戊戌太祖親帥

師下發景先與葉儀同以大學進尋辟爲諮議以親
老辭時李文忠鎮嚴郡特加敬禮恒稱師而不字郡
守王宗顯廉其孝行立純孝坊以表之學者因稱爲
純孝先生所著有羣經指要讀書記大學中庸發微
栢軒集藏于家門人汪與立字師道蘭谿人修德立
行與同邑何壽朋齊名而文學過之嘗謂學者當視
古人爲不足毋視今人爲有餘人以爲名言隱居教
授不求聞達優游林泉以壽終

唐懷德字思誠浙江金華人性敏好學於六經百家
之言無不研究受業於許文懿公而以濂洛爲宗粹

然一出於正元廉訪副使暢篤聘講淮陰聞者傾服
武威余闕持節海右特禮下之或請闕書楊雄九州
箴未知所出思誠卽援筆寫之不遺一字嘗與宋廉
宿錢塘辯諸子是非凡九十餘種歷誦其文以對隨
叩立應廉推其博思誠曰徒博陸澄之書厨耳吾則
藉之以窮理而施諸事也明興用部使者薦除金華
縣教諭轉衢州學錄卒所著有破萬總錄六經問答
鈎玄集書學指南存齋稿共百餘卷行於世

胡翰字仲中浙江金華人自幼聰睿嘗道拾遺鑑坐
候其人還之父奇之益督以學因登許文懿公之門

以所著文質諸黃潛柳貫二公皆稱許不容口或勸
之仕輒辭過廣川弔董生謁曲阜拜孔子墓而歸當
世名公多所交接若武威余闕宣城貢師泰尤稱知
已元季兵起避地南華山中著書自樂明初應聘至
金陵卽爲鄉里奏罷籍田出兵之令全救甚多除衢
州教授洪武乙酉奉詔纂修元史賜金幣以歸所著
有春秋集義胡仲子集長山先生集行於世

陶安字主敬南直當塗人幼穎敏有大志通判馬昂夫
令賦喜雨詩立就奇之肆力問學博極羣書得程氏讀
書日程及呂舍人學規益究心濂洛沉潛道藝元至正

甲申舉江浙鄉薦爲明道書院山長再調高節書院講
明朱陸異同已而避亂家居乙未太祖統兵渡江至太
平府主敬從其師李習率父老出城迎謁見上狀貌驚
謂習等曰主上龍姿鳳質非常人也我輩今有主矣因
說上曰今四海鼎沸豪傑並爭悉多攻城屠邑志在子
女玉帛爾非有撥亂救民安天下之心明公率衆渡江
神武不殺人心悅服以此順天人行弔伐天下不足平
也上曰善吾欲取金陵何如對曰金陵古帝王都龍蟠
虎踞限以長江據其形勢出臨四方何向不克上大悅
畱參幕府未幾命爲都事丙申從克金陵遷左司郎中

贊機務已亥上得劉宋章葉四臣因問四臣者何如對
曰臣謀略不如基學問不如濂治民之才不如溢琛上
多其善讓辛丑知黃州寬賦省徭招來流亡民庶悅服
改桐城令甲辰移知饒州賜詩以行時征伐用急獨善
諭民樂輸軍興不乏乙巳信州賊來攻城主敬與千戶
宋炳率吏民分城拒守選卒爲遊兵晝夜巡捍身登城
諭賊欲因以招撫之會援兵至賊大敗遁去諸將怒請
盡屠從賊者主敬曰民爲賊脅奈何殺之繇是民皆得
全及去饒饒人思德建生祠尸祝之吳元年初置翰林
院召爲學士知制誥兼修國史尋定律令命爲議律官

洪武元年上御東閣與侍臣論前代興亡事主敬進曰
喪亂之原繇於驕佚上深納之嘗賜門帖云國朝謀略
無雙士翰苑文章第一家時召四方宿儒集議禮制屬
爲總裁大配禮端用其議祫禘禮定於詹同齋戒禮朱
升五祀禮崔亮朝會禮劉基祝祭禮魏觀軍禮陶凱而
主敬皆參決焉又奏社壇創屋非宜若祭而遇雨當於
齋宮望祭又言古者天子五冕用各不同上是之御史
有言其隱過者上以爲誣立黜御史是年出爲江西行
省叅政上諭之曰江西上游都會擇卿撫治比蒞任寬
仁達吏事政績彌著四年卒年五十七疾劇猶草上時

務十二事上憫其忠遣使祭於其家贈姑孰郡公上嘗
與儒臣論學術主敬進曰道之不明邪說害之也上曰
邪說害道猶美味之悅口美色之眩目鮮不爲所惑自
非大豪傑之士不能決去邪說不去則正道不興天下
烏得而治對曰陛下所言深探其本矣主敬之學尤精
于易筮驗如神所著有文集行於世崇禎末追謚文獻
陳遇字中行南直上元人資稟純粹識度超遠博通
經史尤邃先天之學元末爲江東明道書院山長轉
温州路教授子弟多從之游及中原亂棄官歸扁所
居室曰靜誠每日焚香拜天願早生神聖救此殘創

丙申太祖渡江御史秦元之薦其學行才識上因以書聘之書稱中行先生期以伊呂孔明濟世安民之事既見與語大悅運策帷中日見親信幸其第者三諸計畫多秘不傳甲辰上卽吳王位命以官不受戊申上卽帝位中行陳治道以復中國先王禮教爲首務三授翰林學士皆不受乃賜肩輿一衛士十人護其出入洪武庚戌春嘗奉命偕中官趙信往浙江廉察民隱還朝密有所陳賜白金彩段除中書左丞力辭辛亥召對華蓋殿賜坐命草平西詔賞賚有加授禮部侍郎兼弘文館大學士復辭時西域進馬甚奇

召入看遂引漢故事爲諫上大悅賜大銀一錠除太常少卿又辭會疾醫藥頻至疾愈入謝上望見連呼君子君子戊午復除禮部尚書又固辭上曰士有志節者不以功名關懷朕不強卿以成卿之名也自是每燕閒輒召問古今得失保國安民大計中行每進言必根諸仁義會功臣蒙譴者多皆力爲救解多所全宥上嘗諭曰先生有子令帶刀侍朕朕當重用對曰臣三子皆幼俟其成立圖補報上悅賜兼金對衣當是時寵遇之隆雖公侯大臣無與埒者甲子秋病卒年七十二上震悼不已遣官賻祭加東園秘器賜

葬鍾山上所賜詩文翰墨甚多併生平著述嘗燬于

火今略見世德錄中子恭繇鄉貢仕至工部尚書文

章政事克世其家

愚按靜誠先生在元季固兩爲儒官至遭際明祖初就徵召卽運策

帷中又嘗奉命入浙廉察民隱還朝密有所陳而其語皆不傳疑是智謀之士然觀其首請復先王禮教每進言必根諸仁義純合孔孟家法且屢辭大位併不願官其子超然於富貴功名之外非有實得於已者能強爲之乎古聖帝明王必有賓師之臣先生是已

朱升字允升南直休寧人幼師陳定宇櫟間九江黃

楚望澤講道湓浦偕趙汭往從學焉既有得乃歸讀

書郡城紫陽祠是秋登鄉貢進士戊子授池州路學

正以身示法江南北者雲集已丑淮甸兵起壬辰

斬黃兵至徽允升所居窮僻雖避兵逋竄而時時著述不輟其學以列聖傳心爲主踐履致用爲功上窮道體幽探化原務究極天人之蘊合理數而一之謂濂洛旣興考亭繼作而道學大明於世然先儒傳注之意所以求經之明也而近世科舉業往往混誦經註旣不能體味乎傳註而反斷裂其經文使之血脈不通首尾不應知味樂學何所自乎於是取易詩書周官儀禮禮記四書孝經小學各爲旁注及書傳補正輯注刻行之尋隱居歛之石門山講學不倦丁酉太祖兵下徽州以鄧愈言其賢降駕親訪之對曰高

築牆廣積糧緩稱王上大悅命預帷幄密議尋辭歸
明年梅花初月樓成上灑宸翰四字賜之嗣是連歲
被徵每蒙手勅別有訪問大抵禮樂征伐之事密贊
居多平生處已以儉待物以仁恩以處鄉隣異以處
患難犯而不較寬而有制是以遐邇宗師小大悅服
自幼學至于捐館六十年間雖出處不常未嘗一日
釋卷編錄考索日益月加動成卷帙吳元年丁未授
翰林侍講學士中順大夫知制誥同修國史戊申上
登極沛恩親製誥詞錫之有曰眷我同宗之老實爲
耆哲之英亾何晉本院學士特免朝謁以示優禮車

駕幸汴得告歸省墳墓嘗受命偕諸儒臣修女誡及
誤齋戒文己酉三月請老歸石門庚戌冬卒年七十
二學者稱楓林先生子同字大同少從父受周官儀
禮遂優於典制洪武初連舉孝廉茂才擢天官晉禮
部侍郎大被寵遇凡太常典禮多其制作與潛溪宋
公典試南宮所拔多名士後遭誣卒于官嘗從楓林
公於紫陽祠及石門因自號紫陽山樵以寓景仰朱
子之意

汪克寬字仲裕一字德輔南直祁門人少穎慧十歲
父取東山問學于饒先生講授之書及當時問答之

言俾習之遂於理學有悟乃取四書自定句讀晝夜
誦習不輟且徧讀六經諸史延佑丁巳年十四得江
浙秋試三場題目揮筆成篇鄉老驚異曰此天才也
明年郡守延雲峰胡先生于郡庠開堂試以激厲後
進仲裕與焉旣謁吳仲延先生而歸扁其齋曰思復
銘于壁以自勵泰定丙寅中江浙鄉試前列明春至
京會試論春秋與主司不合兼對策過直下第歸慨
然曰道不行於時矣益刻厲爲學痛自修飭斥去舉
業覃精經學教授宣歙間其教學者誘掖獎勸無不
成材數與師山鄭公講理論學意氣相得鰲峰玉署

諸老欲以文章舉薦皆力辭嘗偕弟時中讀書城南
扁曰中山書堂學者以其四山環繞名曰環谷因稱
爲環谷先生至正壬辰鄆黃兵至家被焚掠貧不改
樂明興洪武庚戌朝廷命行人賚幣禮聘至京同宋
濂王禕等刪修元史時徵天下逸士纂修得十六人
以仲裕爲首是年九月書成特旨一班俱畱祿仕仲
裕以老疾力辭不受遂宴于禮部受金幣馳驛而還
居三年卒于家年六十九所著有春秋胡傳附錄纂
疏易傳音義考詩傳音義會通禮經補逸綱目凡例
考異等書行於世

愚按環谷先生卒在洪武五年且
嘗應聘修史故程望墩贊其像曰

此考亭世適門生第四人也此龍興史局第一人也
也是岡明儒笑關中馮少墟氏雖已編入元儒攷
略末卷其文頗略不足備尚論
竊謂不妨互存因爲訂錄如右

趙汭字子常南直休寧人母夢飛鳥自齊雲巖來集于
懷覺有娠孩抱聞讀書輒能成誦及長勵志求道不事
舉子業徧詣郡邑師儒旣而負笈四方恒鬻產以爲裹
糧執贄具或非之弗顧聞九江黃楚望杜門著述往拜
之楚望窮經以積思自悟爲主故教人引而不發使其
自思一再登門乃得授六經疑義千餘條復往得口授
六十四卦義與學春秋之要過嚴請益於夏先生大之
夏示以家傳先天易書如杭謁黃文獻公於官署黃公

誦所進書大異之待以殊禮謁翰林虞公于臨川遂授
館於其家相與求草廬吳氏之傳值江西憲試請題虞
公擬策問江右六君子徐孺子陶淵明歐陽永叔曾子
固劉原父陸子靜末舉朱陸二氏立教不同子常具對
朱陸二子入德之門尤爲詳備末乃舉朱子曰子靜所
說專是尊德性而某平日所論卻是道問學上多了今
當反身用力去短集長庶不墮于一偏也又舉陸子追
維曩昔粗心浮氣徒致參辰豈足酬議觀二先生之說
豈鶩湖之論至是而有合耶使其合併於暮歲微言精
義必有契焉子靜則已往矣抑不知子朱子後來德盛

仁熟所謂去短集長者使子靜見之又當以爲何如也
虞公大爲贊歎趙郡蘇伯修與子常友善比入守邦畿
要同往以母老辭歸名其室曰東山精舍自是雞鳴則
起證心默坐涵養本原以爲致思之地而後凡所得於
師指及文字奧義必用向上工夫以求之其爲學大約
在求放心以精思爲本領以自悟爲歸宿得楚望氏宗
傳雖志不苟仕而內蘊經濟頗長壬辰兵起奉母避地
方塘已亥結茅于星溪之古閬山山深閭寥人事幾絕
潛心著書壬寅春始歸東山太祖初起嘗統兵過其家
物色之屢被微辟皆以疾辭洪武二年再召修元史乃

如京師事竣不願仕請還上允之未幾疾作卒于家年五十二學者稱東山先生有東山集嘗言周易春秋二經皆夫子手筆聖人精神心術所存必盡得不傳之妙然後孔孟之教大備其於春秋不舍史以論事不離傳以求經不純以褒貶泥聖人以爲左杜主史釋經而不知筆削本旨公穀知求筆削之旨而不考魯史舊章俱不能無弊爰離經析義分爲八類辯而釋之名曰春秋屬辭以著聖人筆削之旨作春秋集傳十五卷以明聖人經世之志著左氏傳補注十卷師說三卷以爲學者求端用力之階於易著序卦圖說經文開端乾坤屯三

卦解別著堊書問答一卷皆行于世

愚按程敏政道一編王守仁晚年定

論編其說皆本于趙東山然東山擬策謂朱陸初分

晚合特揣度之詞二編出竟指為實事矣况守仁改

易早晚陽朱陰陸非整菴困知記清瀾學蔀通辯明

考其年譜先後孰從而正之哉故曰言不可不慎也

汪仲魯名叡以字行南直婺源人方幼族叔祖古逸

翁喜其有造收教之未幾翁卒執弟子服哀哭殮塋

如禮既冠游江淮兩浙應試不利歸取友于鄉從倪

仲弘士毅鄭師山玉朱允升升趙子常汭諸先生論

學至窮晝夜於諸經子史靡不潛心考究然後反諸

身而自得之體認揅存以實踐焉會元季兵興乃與

弟同集義旅以靖鄉里用泰政恩寧普舉授浮梁州

同知辭歸養親又舉授休寧縣尹攝知婺源州時平
引退明興以弟同累檄取至金陵事白得釋除安寧
稅令肺疾作辭歸當臥病中日勤誨後生如同邑李
文徵休寧范平仲吳蘊中程子靜皆得造就受任于
朝凡遠近祖墓莫不省治立石以表之宗祠祭享一
如古制甲子秋召見命釋西伯戡黎篇詳明稱旨授
承務郎左春坊左司直遂周旋兩宮間與學士朱善
劉三吾同班接席人稱三老上嘗憫其年老氣喘勅
賜朝房俾便趨召御製薰風南來詩以賜命續和和
畢進呈上悅值春夏有囚罪至死者將誅仲魯輒涕

泣俯伏進諫請決以時無傷天地生物之仁上允奏
稱善居二年乞歸養病期秋再至上御奉天門宣召
賜坐詳諭以老病無庸再來理宜杜門謝客輪租應
役以保考終之意仲魯叩首謝明日辭朝出都門送
車百輛觀者填道莫不嗟嘆以爲千載一遇其爲學
推孔孟之道必求諸其中爲人體和用莊內孝外恕
默而智言而信爲文博厚澹雅嘗取新安師友爲集
以明理學源流及著浯溪集行于世學者稱蓉峰先
生壽七十九

宋濂字景濂浙江浦江人少受學於柳貫黃潛吳萊聞

人夢吉四先生之門比長以文章名海內至正中大臣
薦爲國史編修以親老固辭入龍門山著書歲庚子明
太祖聞其賢遣使徵至金陵築禮賢館以居之上問取
天下大計首以不嗜殺人對上甚喜俾授太子經每詢
以治道必以仁義爲言及四字平定上方偃武修文正
彝倫復衣冠制禮樂立學校凡先王之典多講行之而
景濂實預其事嘗召講春秋左氏傳奏曰春秋乃孔子
褒善貶惡之書苟能遵行則賞罰得中天下可定也上
一日御端門論及黃石公三略且口釋之景濂起進曰
尚書二典三謨帝王大經大法靡不畢具願陛下留意

講明上納而謝之洪武初甘露屢降上問災祥之故對曰受命不於其天於其人休符不於其祥於其德是以春秋不書祥而記異上嘗言古帝王當宴安之餘養好神僊朕謂國治民安心神怡康卽神僊對曰漢武好神僊而方士至梁武帝好佛而異僧至使移此心以求賢輔天下其有不治乎以議孔廟禮忤旨謫知安遠縣

景濂

爲司業議當尊三皇立五學並祀舜禹湯文爲先聖上斥之時浙人貝瓊著釋奠解以辨其誤大意謂三皇宜祀而不得祀之於學也學之有廟繇孔子而建則宜以孔子爲先聖顏子爲先師而三皇不預今欲崇三皇爲先聖使居孔子之上不足以褒其功降孔子未幾召入爲先師使混於高堂生之列適所以貶其德

上問帝王宜讀何書景濂請讀真德秀大學衍義上立

取覽悅之景濂講衍義中司馬遷論黃老事講畢復言
曰漢武嗜神僊之學好四征之功民力旣竭重刑罰以
震服之臣以爲人主能以理義養性則邪說不能侵興
學校教民則禍亂無從作刑罰非所先也上曰朕上畏
天下畏兆民兢兢業業不敢自逸景濂離席頓首曰
陛下此心古先哲王之心也書曰予臨兆民凜乎若朽
索之馭六馬爲人上者奈何不敬正謂此爾願陛下慎
終如始天下幸甚初受詔總修元史發凡舉例一出成
法手定其紀傳之大者至是奉命序祖訓錄集辨奸錄
纂大明日曆一百卷寶訓五卷上皆稱善方上之大封

功臣也召宿大本堂討論達旦遂歷據漢唐以來故實
量其中而奏之傳于理而後已其傳皇太子一言一動
皆以禮法諷諭使歸於道讀書至切於政教及前世興
亾之故必拱手揚言曰君國子民之道當如是不當如
彼且推人情物理以明其義皇太子每斂容嘉納敬禮
未嘗少衰其佐成均所教多公侯大臣子弟蒞之以莊
率之以正日進諸生立兩序據坐執經敷揚闡奧之旨
迪以孝弟忠信之道學者帖然尊服嘗侍上至後苑觀
穫上曰農事成矣對曰國以民爲本民以食爲天陛下
知稼穡之艱難而念民生之良苦實盛德也上問曰三

代以上所讀何書對曰上古載籍未立不專誦讀而尚躬行人君兼治教之責躬行以率之天下有不從教化者乎侍上既久每燕見必命茶賜坐陳對間直諒不務文飾而隨事寓諫能使上意解命之叅大政則力辭問以廷臣賢否第言其善者深密不洩禁中語有奏輒焚稿嘗書溫樹二字室中有問內事者指二字以示之初除江南儒學提舉尋改起居注繼爲翰林學士爲國子司業兼太子贊善大夫晚爲承旨先後二十餘年以道德輔佐明祖俾天下歸心愛戴厥功居多日本使奉勅請文獻百金卻不受上問之對曰天朝侍從之臣受日

本金非所以崇國體也洪武十年致仕後以孫慎累安置茂州行至夔病卒年七十三居恒德尊而不居位顯而彌恭晚年於性命之理益究其極視外物之往來若不相干嘗曰古人爲學使心正身修措之行事俯仰無愧而已繁詞複說道之蔽也故作事不尚表襮務合於義教人皆隨其質而導之使入於善尤篤於倫品父子兄弟夫婦之間皆盡道可法與人交和易任真無鈎距縱爲所給亦弗與較臨財廉非其分不取大書於門曰寧可忍餓而死不可苟利而生凡四持文衡試天下士得人爲盛接引後學惟恐弗及四方士以得一見賜十

言爲幸及告歸上有後學無師之嘆又嘗許爲純臣爲
賢君子說者謂獲上信友皆內誠外恕之驗雖已貴顯
布衣疏食無異寒士不事生產不置田宅或勸爲子孫
計答曰富貴豈一家物哉吾乃所以遺之也惟刻意於
學自少至老手未嘗釋卷當致政歸青蘿山闢一室曰
靜軒終日閉戶纂述人不見其面戒子孫毋至城市姻
婭有以郡縣事爲託者皆峻謝之談及時事輒引去不
與語切於仁愛聞民有困乏者食爲不飽視近而甚明
夜燃燈于几卧絺帷中閱蠅頭小書一黍上能作十餘
字皆可辯點畫人以爲不飲酒寡嗜慾所致初宋南渡

後新安朱子東萊呂氏並時而作皆以斯道爲己任婺
實呂氏倡道之邦而其學不大傳朱子一再傳爲何基
氏王栢氏又傳之金履祥氏許謙氏皆婺人遂爲朱學
世適景濂旣因金許門人而究其說獨念呂氏之傳且
墜奮然思繼其絕學每與人言而深慨之嘗奉勅作觀
心亭記而以精一執中爲說作六經論而謂六經皆心
學作七儒解而歸之願學孔子作諸子辯而終於周程
二子又著段千篇歷闢金陵碧山東嘉永康金谿橫浦
六家之學之非而獨以金華之學爲正且曰當時得濂
洛之正者鼎立而爲三金華也廣漢也武夷也其道則

一而已武夷主於知行並進廣漢則欲嚴於義利之辯
金華則欲下學上達雖其教人入道之門或殊而三者
不可廢一也循其言求之不可謂之無與於斯文矣惜
乎矜侈聞見信好機祥多作佛老二家文字載諸集中
未免博而不精耳其出藍弟子則寧海方孝孺也所著
有龍門子潛溪內外集蘿山集翰苑集芝園集孝經新
說周禮集註浦陽人物記等書行於世學者尊爲潛溪

先生宣德中謚文憲

門人吳興林靜曰天付斯文于人
也豈偶然哉必有不合而同不期

而至者故吾夫子與朱子生同庚戌今潛溪先生宋
公之生又於是歲人謂聖賢之出鍾靈降秀爲世禎
祥天之所俾信乎其不偶也周室旣衰先王之道如
日斯晦微夫子六經孰正人道孰明是大有功於萬

世者也時降道汗寥寥千有餘年乃能集其成會其
要得吾夫子之指歸者其惟朱子乎公乘文明之會
贊一代之治以其餘力使學者復古屏棄科舉之趨
一闢于理義之學其功不在朱子下海宇之內一人
而已耳然則夫子之道被于萬世當時仕止乎魯朱
子在宋號爲尚文之國立朝僅四十日終厄僞學而
公得君行道者甚久澤能加于人文可垂于世光明
峻大焰耀無窮豈天之付公者獨厚而公之報乎天
者亦將未艾也公年六十八卽謝政天子數畱止公
公固辭曰天道惡盈人道止足詞意誠款上知不可
強通止益見公進退從容皆合乎道宜其居爲儒宗
出爲勲德以文華國以道佐命實有係于斯文之重
輕矣世之論公者徒以文學際遇爲事至公之得乎
天而契乎聖賢者又烏能窺其端倪也哉薛應旂
祠碑略曰浦江金華屬邑也金華之學自東萊呂成
公倡之而何王金許四賢相繼而出說者謂爲宋學
世適今其立言著論昭然具在固非後人之所敢擬
議者然要之皆聖門之羽翼也先生繼起是邦遭逢
聖主文章事業振揭宇宙士人籍籍咸稱名臣至其
所深造自得者上躋聖真直達本體則反爲文章事

業所掩而不得明列于理學之列嗟乎世有真儒若
先生者哉觀其斥詞章爲淫言詆葩藻爲宿穢期于
剗削刊落以徑趨乎道德居常或終日靜坐或支頤
看雲或挂冠行松間或擊磬而浩歌脩脩然如塵外
人及讀其所著與凡六經之論七儒之解觀心之
記則實有不能自己於言者是豈徒欲以文章事業
名世者哉奈何學術難明見聞易眩而先入之言之
易行所以疑先生者僅僅明見聞易眩而先入之言之
傳周召得其時則爲名臣顏閔冉仲有曾思孟不得
其時則爲大賢固不當以彼此論也况究觀先生之
學在宋則有若陸子靜在元則有若吳幼清蓋皆聖
學正傳後先一轍其與前四賢之繁簡紆直世必有
能辨之者而粗豆獨後品儕未當豈所以表先正而
示後學哉此固於先生無所重輕而祀典之浸混學
術之不明余竊憂之故因先生之祠成不避而大書
之石 愚按呂東萊氏從朱子于寒泉精舍共輯近
思錄是其學本同也陸子靜則其生平所欽慕及爲
考官時又嘗見其卷而議之後爲翫湖之會不過欲
化異同作和會計耳卽吳草廬推服朱子甚至嘗合
贊爲豪傑之才聖賢之學世人徒泥其德性問學之

語遂坐爲陸學其實呂吳二子皆非祖陸倖朱者也
潛溪早受學于柳貫而貫嘗受學于仁山金氏是固
朱學也著段千篇而痛闢金谿其不爲陸學又明甚
嘗尚論東萊思傳其學自是公心要之傳呂亦所以
廣朱耳何方山不察竟以別派目之耶不惟不識潛
溪抑且強分朱呂然此當是方山中年議論及著考
亭淵源錄後
必不爲爾矣

曾魯字得之江西新淦人七歲能暗誦九經一字勿
遺禮部簡正禮欲以神童舉於朝其父止之稍長博
極羣書自謂未要於至道述長書一通謁虞文靖公
集於臨川虞公大悅曰昔程子與張敬夫年十六七
慨然有志聖賢之道子能如何讓古人時年蓋十
九矣由是益潛心濂洛關閩之學分別理義密如蠶

絲牛毛尤愛吳文正公所述書無論大小一一訪獲之玩繹未嘗釋手久之充然有得盤桓林泉以道自娛若將終身焉壬辰寇亂乃集衆衛里稚牛醺酒開陳順逆禍福衆皆警服無敢犯非義者人號曰君子鄉洪武二年徵修元史厥功最多史成賜金幣仍畱編類禮書遷入儀曹易高麗祭常開平不書年號之文發安南陳叔明篡弑其主日熉之罪甚得大體五年二月上問丞相曰曾魯在禮部今何職耶對曰不過主事卽日超六階拜中順大夫禮部侍郎得之以順字犯父諱辭就朝請下階吏部以國法有定不許

前後奉命草詔撰賦俱稱旨是年考京畿鄉試得疾至冬乞歸而卒年五十四得之蓄德熙和內行淳備嘗三年間葬十餘喪撫存孤姪甚至輕財仗義喜周人急四方賓客日登其門倒屣迎之了無倦容當修元史時宋濂實爲總裁相知最深共坐官舍更析互辨每至夜分歎末學之空疎傷古道之寥落又復相視輒然一笑嚴陵徐尊生嘗有言曰南京有博學之士二人一以舌爲筆一以筆爲舌其意蓋謂曾與宋也所著述有六一居士集正訛南豐類稿辨誤藏于家他俱未脫稿嘗扁其齋曰守約學者稱守約先生

孫大雅名作以字行別字次知南直江陰人世以儒
名自曾祖潁川四傳至大雅而學益茂至正兵起大
雅挈家三吳間盡棄他物惟載先代藏書兩敝簾張
士誠聞而廩之卒以毋病謝去用是益貧然熙怡自
若略不爲動從游者爲買田築室寓于淞焉洪武癸
丑召纂修日曆書成例授翰林編修官以老病乞外
除太平府教授尋遷國子助教明年分教中都又明
年還成均晉國子司業前後八載皆儒官大雅器宇
端凝負才通爽而處世不阿或以是非煽之惟自切
責不以怨人生平酷好著書嘗著東家子江西饒介

之先見其稿而喜之屬曰幸勉成之必有知者及成得十二篇潛溪宋公得其圖說答性難等篇極爲稱許以近代儒者況之謂王魯齋金仁山許白雲諸公未知孰先後也別著詩文有蒼螺集行於世

王禕字子充浙江義烏人幼秀爽奇敏及長長身山立屹有偉度習古學師事黃潛元政亂爲書七八千言上時宰嫌其切直格不聞隱青巖山著書戊戌太祖徵署中書省掾叅預機務語稱子充而不名愛其文章命爲四言詩以授皇太子辛丑進平江西頌上覽喜曰吾固知浙東有二儒卿與宋濂耳學問之博卿不如濂才思

之雄濂不如卿授江西儒學提舉累遷起居注出同知
南康府事洪武元年召議卽位禮忤旨降漳州通判尋
上疏言帝王祈天永命在乎修德修德之要有二忠厚
以存心寬大以爲政周歷年八百漢享祚四百皆繇此
道願法天道順人心寬刑威減賦稅以固國本疏奏上

嘉納之

陳建曰此我朝開國名臣第一大奏疏其言精
醇剴切洞達理要雖周召孔孟之告君無以越

此矣二年詔修元史爲總裁官除繁剔穢力任筆削書成

拜翰林待制同知制誥兼國史院編修預教大本堂出
使吐蕃尋召還居原官經明理達善開導召對殿廷必
賜坐從容燕語嘗進講大學陳德厚民懷之說上大悅

五年上以雲南弗臣命子充持詔往諭之卽日就道旣至見故元梁王諭以順逆禍福梁王君臣相顧駭服已有降意改館而加禮焉會元之遺孽有自立沙漠者遣使脫脫來徵糧且約連兵拒我覘知梁王有二心逼殺我使以固其意梁王兩可未決匿子充於民間脫脫知之愈責誚梁王梁王不得已乃出子充與相見脫脫欲屈之子充罵曰汝燭火餘焰尚欲與日月爭光耶度不免顧梁王曰汝朝殺我大兵夕至矣遂遇害時六年六月之二十八日也至十四年征南將軍傅友德等旣下雲南子充死節事始聞於朝建文元年卹贈翰林學士

奉議大夫謚文節開國文臣有謚自子充始正統間改忠文所著有青巖叢錄等書行於世學者稱華川先生子紳字仲縉聞父死節隻身走雲南求遺骸不得述滇南慟哭記與方正學友善嘗尊正學爲百代儒宗勸其著書以淑來學正學不應仲縉悟遂略文藝潛心道德建文卽位以薦召爲國子博士預修高廟實錄元年四月上言父死節狀請卹得贈官賜謚越明年卒紳子徐字叔豐少有志向遊於方門深見器許妻以女迨其難之及也與正學表姪鄭珣至聚寶門外謀收塋不可得卒坐逮繫文皇念其祖死國之忠特從宥免且欲官之

力以疾辭歸隱青巖下爰輯方氏遺文爲侯城集以傳
嘗與童景庸書云痛念遜志名蹟日就湮沒欲執事與
令兄商確搜輯其學行幽潛生平始末爲家傳行狀以
傳同志有愛慕之心者自能默識謹藏或可待時發揚
於萬一其時正在厲禁嚴緝中也初文節公之死傳聞
蓋剗以醢故仲縉抱痛每食必斥重味叔豐性至孝一
遵父志子孫相承閱數十年不變事母丁氏如事其父
送終盡禮三年不御酒肉學問該博士從游者日衆郡
邑交重之恒禮爲鄉飲賓至以分獻于聖廟疎髯偉貌
出必儼然古冠服人爭觀之曰此王先生也著有青巖

高聖朝文纂金華賢達傳蹟文章正宗諸編卒年五十

九門人私謚曰孝莊先生

華川先生著從祀議言漢董仲舒唐孔穎達宋范仲淹歐

陽修真德秀魏了翁元吳澄七人當從祀略曰白夫孟軻既往往聖學不明邪說盛行異端並起歷秦至漢諸儒完經翼傳局於顓門之學而於聖人之道莫或
有聞惟董仲舒號稱醇儒其學博通諸經於春秋之義尤精所以告其君者如天人性命仁義禮樂以及
勉強尊行正誼明道之論皆他儒所不能道至其罷黜百家表章六經以隆孔子之教使道術有統異端
息滅民到於今賴之功殆不啻孟子秦焚之後聖經闕佚漢儒收拾散亡各爲箋傳而偏學異說各自
名家晉宋以來爲說滋蔓去聖既遠莫可考證唐初孔穎達受詔撰定諸經之疏號曰正義自是以來著
爲定論凡不本於正義者謂之異端誠學者之宗師百世之取信也聖人之道或著事功或載文章用雖
不同實則一致三代以下人才莫盛于宋東都其間慨然以聖人之道爲已任而著之行事者范仲淹而
已其言先憂後樂雖伊尹之任無以尚之况當其時

天下學術未知所宗尚而仲淹首以中庸授張載以爲道學之倡蓋其爲學本乎六經而其議論無不主於仁義歐陽修與仲淹同時明聖賢之學而著之文章其易春秋諸說詩本義等書發揮經學爲精至其欲刪諸經正義識緯之說一歸於正尤有功聖道至于本論等篇比之原道何愧自周敦頤接聖賢千載不傳之緒而程顥兄弟承之朱熹有作五經四子皆有傳注論述統宗會元集聖賢大成中更學禁真德秀魏了翁力以尊崇朱學爲已任而聖賢之學乃復明真氏所著有大學衍義讀書記魏氏所著有九經要義大抵皆黜異端崇正理質諸聖人而不謬足以繼朱氏所傳之緒者也及元興許衡起于北方尊用朱氏之學以教人吳澄起于南方考經大學中庸易詩書春秋禮皆有傳注隱括折衷于禮經尤多刪正凡以補朱氏之未備而其真修實踐蓋無非聖賢正大之學按祀法有功於聖道則祀之是七人者有功於聖人之道而從祀闕焉此甚不可又言曾皙孔鯨祀廡下曾參孔伋配堂上父子失序宜歸正及司馬光於程顥程頤爲先進張載於二程爲表叔而位次皆在下其先後次第亦不可不明若夫荀况揚雄何

休王弼之徒有不當與於從祀者茲又未敢以遽數也云云 愚按華川之議若此其後果得祀者董仲舒與德秀歐陽修三人也既祀而旋罷者吳澄一人也訖今尚未祀者三人則孔穎達范仲淹魏了翁也議罷苟况楊維何休王弼之徒而不悉數姓氏後亦次第罷祀外有原議所不及而後人創議增祀之者又得九人弘治間祀楊時萬曆末祀羅從彥李侗此據洛閩傳緒而言最爲得禮正統時與真德秀同祀者胡安國蔡沉二人以其有功經學嘉靖時與歐陽修同祀者后蒼王通胡瑗陸九淵四人其祀王胡也因蔡探先臣程敏政議其祀后陸歐陽也則當時執政不無寓私意乃華川於此或在所詳焉或在所略焉雖曰互有得失亦足覘其學識之陶鑄古今衡量羣儒可俟百世矣今人於華川第以文章忠節目之而不知其懋於理學卽從祀一議海涵岳負其位置居何等也嗟乎若華川先生以行已則有耻以奉使則不辱至以死殉之豈非聖門所謂士之上者與

雒閩源流錄卷一

終

碓閩源流錄卷二

無錫張夏纂

門人婺源黃

昌衛校

吳海

劉宗道

余應

梁寅

陳謨

張九韶

張存

解開

何英

郭櫝

桂彥良

范準

李仕魯

謝應芳

華宗韓

傅淳

朱右

方克勤

趙謙

金固

方孝孺

正學先生

王叔英

周是修

卓敬

程本立

胡子昭

林嘉猷

鄭智傳

俞貞木

吳海字朝宗福建閩縣人當元季以學行著稱見四方

兵亂遂絕意仕進深自韜匿間與同志講說經義更相
倡酬一時名人如貢師泰王翰林泉輩皆推畏友明興
部使者欲薦之有司轉相推轂力辭不就闢一室于家
園隙地酣經枕史娛適其中因採摭古人孝子順孫節
婦烈女及兄弟之相友娣姒之相宜者附以感應禍福
各爲一卷以傳布閭巷令小生稚女誦而習之名曰命
本錄謂克培其本則司命者皆無權也又著書論楊墨
佛老爲六經之賊管商申韓爲治道之賊遺事外傳爲
史氏之賊支詞蔓說爲文章之賊謂上之人亟宜取其
書而禁絕之使天下曉然知正道之當趨岐徑之當塞

名曰書禍平居喜聞過或有告之者立改其失因扁其
客坐曰聞過軒又自號魯齋志所願學也爲文嚴整雅
奧咸有矩程而一歸諸理後學咸宗仰之有聞過齋集
行于世

劉宗道名駟以字行福建漳州人洪武壬辰徵秀才
八千餘人入試朝政宗道第一仍命學士詹徽密察
諸儒中特異者復居德行第一以布衣侍坐共論治
道拜都察院左都御史條上二十事言甚切直上命
所司採行之學者號愛禮先生有愛禮集傳于世陳
真晟讀之稱其繼陳北溪而起大有功于名教云

余應字則亮福建政和人早從江惟志游以私淑文公之學性凝重寡言笑恒以禮自律家邇闔閭足跡未嘗入縣門早失所恃事繼母愉而婉處繼母弟順而友凡飲食衣服必先弟而後及已洪武初以明經薦起爲儒學訓導遷畱守司知事執父喪一遵文公家禮不用緇黃鄉人化之

梁寅字孟敬江西新喻人貧而力學元末舉於鄉辟爲集慶儒學訓導以親老辭歸隱居教授太祖平定四方徵天下名儒修禮樂新一代之制孟敬就徵已六十餘矣以禮律制分爲三局孟敬在禮局審訂精詳諸儒推

服書成賜金帛授官以老病辭許之結屋石門山四方
稱爲梁五經或問之曰吾輩免亂離之禍享太平之福
何以祝吾君孟敬舉手加額曰願吾君恭己九重存心
四海擴天理而遏人欲進君子而退小人人以爲愈於
華封三祝新昌有人士負氣自豪筮仕得巖邑比行來
見請教孟敬曰清慎勤乃居官三字符也子力行之復
何言其人請問天德王道之要孟敬微笑徐答曰言忠
信行篤敬天德也不傷財不害民王道也其人退語人
曰孟敬議論平平耳越三年其人以不檢罷官歸語人
曰吾不敢復見石門先生

陳謨字一德江西泰和人洪武初徵至京師賜坐議禮學士宋濂待制王禕交章請畱爲國子師以式國人引疾辭歸家居教授屢應聘爲江廣考試官所拔士往往知名自幼能詩文初習周易後兼通詩書三禮諸傳旁及諸子百家涉流探原辨析純駁犁然歸于至當雖不願仕而於當時之務一一籌諸胸中有扣如響嘗謂學必敦本莫加於性莫重於倫莫先於變化氣質若禮樂刑政錢穀甲兵度數之詳皆所當講一時經生學子靡然從之惰者作拘者暢塞者通爭謂江西大儒復出事親至孝晨昏省定之禮甘旨修髓之奉不懈益虔其於

弟友愛尤篤族黨中有爲不善不敢使聞所著有海桑集書經會通詩經演疏行于世學者稱海桑先生楊文貞公嘗贈以詩曰純明程伯子灑落邵堯夫或曰其爲人似云

張九韶字美和江西清江人幼穎異年十三卽能詩詞博通經史元末累舉不第洪武三年用薦爲縣學教諭十年擢國史助教爲人篤實每教諸生必端坐不言有所請問徐徐應答不過一二語然理義明暢人深服之十一年遷翰林編修十三年四月致仕太祖親爲文賜之嘉其有著書立言之功合善始善終

之義末有云卿之去矣朕將誰從不勝徬徨歎息焉
所著有理學類編八卷羣書備考十二卷及元史節
要行于世

張存字性中南直丹陽人洪武中歲貢任江西安遠
縣主簿五歲能賦詩長從宋文憲劉文成二公游其
學以敬爲主著有雪洞集行于世祀邑學鄉賢祠

解開江西吉水人洪武元年以明經薦授縣學教諭
訓迪有方吉中人文道學之盛實自解氏始其學以
主敬爲本戒懼慎獨爲功學者稱爲筠簡先生
何英江西鄱陽人性警敏絕人不事詞章往學於王

松塲得饒雙峰黃勉齋之傳造詣益深松塲寄以詩
有雁梅谷裏先春意之句遂號梅谷明初累薦不起
建玉溪書院以納天下來學所著有四書釋要詩經
詳釋易經發明諸書歿祀邑學鄉賢祠

郭櫟字德茂浙江太平人其高祖世卿卽正肅公之兄

也

正肅公諱磊卿字子奇號允齋
游朱文公門端平六君子之一

傳至德茂自僊居徙

黃巖之松山里後屬太平縣遂爲太平人少勤問學比
壯特有所悟繇伊雒上遡洙泗求聖賢用心燕居獨處
衣冠修整卽祁寒暑雨危坐終日及與人接和氣滿容
雖居貧嘗有以自樂其所涵養端用靜中功夫言動應

酬一循乎禮邑士人多從之游其爲教謂必先收放心
方見得吾道端倪卽聖賢言語皆有歸著又曰學者若
不懲忿窒慾則自家都壞了此是大切要處父沒會兵
荒不克塋者十餘歲茹蔬抱戚未嘗破顏迄塋已始御
酒肉母疾衣不解帶親爲沃面澡身浣衣滌席凡六閱
月手指濕爛成疹終不以人代與其兄友愛尤篤鄉里
化之雖狡猾者亦革面輸欵終元之世隱居教授嘗作
感秋酷熱諸詩以寓意洪武初用御史李時可薦始就
饒陽知縣三年邑大治以從兄故坐免邏者察諸途搜
篋中惟所著易說禘評暢菴稿數十卷及爪髮一束以

聞太祖嘉其廉賜紗幘銀帶寶鈔以旌之既歸貧益甚
課其子熙躬撻井曰一日諸生及門聞打麥聲視之乃
先生也卒年六十二門人私謚曰貞成先生熙亦博學
篤行能世父業從子元亮有文名著尚書該義

桂彥良原名德以字行浙江慈谿人洪武初應薦召見
命作香几贊特授太子正字俾入侍太本堂錫賚有加
上嘗從容咨以治道對曰道在正心而正心之要又在
懲忿窒慾他日上謂彥良曰法數行而數犯奈何對曰
用德則逸用法則勞法以靖民則民勞而弗靖德以靖
民則民靖於德矣上曰善上嘗以帝者師稱之又謂江

南大儒惟卿一人對曰臣不敢當宋濂劉基上曰濂文人耳基峻隘不如卿也尋改晉王府右傅一以正大之學輔導旣致仕條陳十二事名曰萬世太平要策以進著有和陶詩清節等集行於世

范準字平仲南直休寧人幼恂恂孝友性敏善記甫弱冠讀諸經史百氏之書殆盡復念明經應世未足稱儒者於是力求聖賢之學師事朱楓林趙東山汪蓉峰三先生至正壬辰紅巾寇起束書從楓林避地石門者三年丙申郡邑大亂喟然歎曰族祖求邇翁與程徽菴以道鳴於宋吾當繼其後遂絕意當世崑

求身心至忘寢食雖俯仰之資愈困處之泰然非其道一介不取日以講學爲業游於閩從學者益衆及歸隱雲溪葺東山詩文併訂春秋集傳廣行之洪武戊午以明經舉本邑訓導辛酉召爲葭川吳堡令開設舊治安復流傭乃興學校清苦自甘洞民化服諸大吏多士咸頌爲有用道學乙丑擢工部主事逾月卒于官年四十八無以爲殮久之始得歸塋平仲爲文弘議濶論要在發明孔孟嘗曰孝弟忠信爲學之本記誦詞章之習抑末耳著有莖甕稿西游率稿謬稿塞白稿何陋軒稿宗譜等書行於世

李仕魯字宗孔山東濮州人少時奮志下帷三年不窺外戶胸藏該博造詣淵沉益切尚友之志聞婺源朱公遷得晦翁嫡傳千里負笈從之百舍重繭一見深相契合耑精探究盡得其所學而歸值元季大亂隱居不出以待天下之清明祖龍潛時卽熟其名洪武初詔求天下有能傳朱學者所在以聞有司乃舉宗孔應詔乘傳至京入見上迎謂之曰吾求子久矣卽命爲黃州府同知宗孔奏言臣所夙願惟欲朝夕陛前備顧問以行所學上曰姑以民事試子耳抵任風裁峻整政理寬和民癯殘者卹之吏莠政者斥之

暮年而刑清訟簡境內又安用以治行卓異聞于朝
召拜大理寺卿律比精嚴守正不撓時有僧金碧峰
者應對稱上旨寵眷日隆求爲僧建職司宗孔進曰
陛下建極之初意所祈向卽爲後世子孫天下臣民
之標表奈何不崇聖學而信外道乎懇疏至三十章
上堅決不從宗孔曰陛下旣深信其道無惑乎臣言
之不入也願還陛下笏放歸田里上震怒命武士梓

搏之死於堦下

愚按明祖作極之初而爲僧人建職
司此誠不可不諫然古者人臣三諫

不聽則號泣從之進言亦有節度矣今宗孔懇疏
至三十章又出慝言以干震怒不惟殺其身也至
使其君被殺諫臣之名豈未聞數斯辱之戒與信
而後諫之旨耶雖曰上以責難陳善下以守正聞

名臣清議錄 卷二
邪君子仰其忠
而惜其愚焉

謝應芳字子蘭南直武進人自幼潛心理學至正初
隱白鶴溪上題所居室曰龜巢因以爲號授徒講道
郡守辟教鄉校子弟先質後文指授斐然浙江行省
舉爲三衢清獻書院山長不就未幾兵起避地吳中
挾其妻子宕漾一舟瀕危數四踰年而後僦室以居
時時乏絕未嘗以爲憂也旣而吳人慕之爭致爲弟
子師差得自給明興江南平歸隱芳茂山年踰七十
好古嗜學不減疇昔每令諸孫誦原道太極圖說西
銘等篇以資玩繹年九十七而終在鄉則表鄒忠公

之墓正張睢陽之像去學宮土地祠之配變喪禮用
佛教之俗在吳中亦準是以施之嘗輯顧元公墓以
諷切張氏蓋雖倉皇播遷而一言一行惓惓以正人
心闢邪說表章儒先扶植名教爲急如此著有辨惑
編三卷崑辨流俗誤信神佛之失澠池人曹端最喜
讀之別著思賢錄五卷懷古錄三卷毘陵續志十卷
龜巢稿二十卷並行於世子林有文學工書法亦著
有雪樵集煮雪窩稿延陵通紀字學原委等書
華宗韓字公愷南直無錫人父幼武字彥清幼孤事
節母陳以孝聞高尚不仕著黃楊集公愷幼嗜書寒

暑靡怠尤研精易學嘗廣搜諸家傳注叅覽以求其
指歸元季兵起奉其親往來蘇松間造次顛沛務悅
親心時平還錫定居延祥里遂爲鷺湖華氏之始祖
勤畚耜讀以修身教家爲務久之營祠堂徧祀隆亭
堦陽間五大祖墓於是斟酌古禮以冠昏喪祭之儀
可通行於士庶者條而錄之附以古人嘉言懿行總
爲一帙名曰慮得集以訓示子孫洪武中累徵孝廉
明經儒士俱辭疾不就喟然歎曰吾平生志不在溫
飽成童時讀小學大學日知其味有契於心弱冠時
膝下周旋仰成嘗亦多過雖弗憚改深愧不貳之戒

近乎立年則志乎誠正修齊之學見賢則思齊見善則企及故蒙先公特垂愛焉循循然惟欲誘我進於善嗚呼先公雖棄世而諄諄之意終身不敢忘也故力學冀於成人竊揆如是達則忠君濟物窮則以淑其身奈何才疎識卑時命蹇剝加之痼疾乃無一遂亦繇稟質柔弱過乎畏慎而然深省所蔽凡臨事之所當爲者卽奮勵自強期以必克及乎進也輒得其咎退也雖悔而無尤比比若是蓋得夫節之初九之象也審矣碌碌而無聞也尚何言哉年四十一遇冬至閉關惕然深念乃以平昔不能撻執而切身之用

者四要刊書于几日以自省曰勿貪可無悔守分可
無憂堅制可無怨克勵可無求斯足槩其篤志困學
矣居恒好自簡束卽閒居燕坐衣冠必整肅遇事有
不平能以理自遣未嘗露聲色又嘗慕效朱丹谿之
爲人旁通醫術多蓄善藥以施有疾者不問其值縣
是名聞遠邇人多德之下丑九月病革召別家人索
筆賦詩而逝年五十七學者稱貞固先生

傅淳字伯厚浙江慈谿人家世業儒父時階以道學
鳴於時伯厚能傳其家學洪武中屢詔徵召卒不就
鄉人稱爲退密先生所著有洪範敷言性理叢說大

學補略視志稿等編藏于家

朱右字序賢浙江寧海人光廷先生九世孫嘗游李
五峰陳兩峰之門避亂隱居益力於學旣而讀書有
覺爰錄其尤要而切近者輯而爲編名曰性理本原
其書首揭河圖洛書本諸天以示乎人次敘太極圖
說定性書好學論西東二銘擴諸人以復乎天後附
通書感興詩而自序其首曰道之大原出於天而天
亦氣化中一物耳然其所以爲造化必有尸之者理
而已矣故曰天生蒸民有物有則又曰體物而不可
遺則理者又天地萬物之本原也是故君子卽物以

察理未嘗有無理之物卽理以觀物未嘗有物外之
理子程子曰冲穆無朕萬象森羅已具殆難以跡求
之也蓋性理大全未作之前此書已兆其端而後人
有疑朱子之格物爲求向外者此序亦先破其蔽矣
洪武三年詔徵天下在野名儒至京考禮伯賢與其
選將行鄉人謝肅爲序以送之期其復三代之禮樂
比至兼預修元史大明日曆二書終晉府長史
方克勤字去矜浙江寧海人好古嗜學研究羣經及
濂碁關閩遺書尋鄉先達授受原委精思力察而允
蹈之慨然以爲不合天人以爲學非學也居家孝友

備至與人交洞見肝膈自奉簡素一布袍數十年不
易日不再肉同列飲醉大詬去待之益恭酒解來謝
去矜陽爲不知者曰昔之夜吾亦大醉不識君何謝
也元末隱山谷中明初徵不就索之急乃以易試中
第二授濟寧知府爲政以風俗爲急德化爲本終日
衣冠坐堂上召諸吏授詩書法律性不喜近名嘗自
誦曰近名必立威立威必害人吾不忍爲也庭不陳
械鉏懸韋鞭楹間示無刑罰存心畏慎晝所爲夜必
告於天居五月誣棄倉灰謫役江浦子孝孺上書請
代不報遂以病卒于京台人稱爲愚菴先生同時宋

濂謂其學問得之考亭其後謝鐸亦以聞知稱之

趙謙字撝謙浙江餘姚人原名古則後因薦者言遂以謙名宋宗室秦悼惠王之後幼孤貧寄食從山寺與釋子同塾書克已復禮之目爲用功準的聞金華鄭四表學有淵源在師之得其傳歸隱萬書閣日潛心焉洪武初徵修正韻衆以其年少出爲中都國子監典簿與同官論事不直罷歸築考古臺述六書之音著聲音文字通周易提綱諸書凡三百餘卷大臣薦宜大用上曰吾欲老其才而用之復薦於皇太子乃召爲瓊山教諭明年進所著書詔翰林博議不報

復還瓊山作瓊臺布學範教化大行嶺表以南稱爲
趙夫子其於世利聲華澹然無繫直義所在目無王
公雖以此致阨窮不悔也卒于番禺年四十五

金固字守正江西新淦人四歲母口授五言詩輒能
成誦稍長能詩刻厲學問日親良師友講說遂究心
於易就質於安成劉雲章吉水夏道原兩先輩稱忘
年交其學以孔氏爲宗漢以下則曰周程張朱吾師
也洪武中臨江太守聘爲郡學訓導誠諸生以敦本
務實崇正學爲正人無徒苟事文藝爲利祿計至評
論古今人才賢否亦必準此意諸生翕然化服生平

孝友恭儉出於天性一言一行皆以誠爲主動循禮
法布素泊然家無餘蓄乙巳五月畱郡庠顧謂次子
行曰明日之夕吾其死乎得微疾諸生進醫藥不飲
曰命矣手書四十字詩一章寄示長子幼孜於外書
遺命數事示行又書四十字詩一章謝素所往來者
翌日自題其神主晚沐浴更衣端坐卒年五十七所
著有涓湘稿藏於家

方孝孺字希直

一字希古

浙江寧海人愚菴公克勤仲子生

之夕有大星隕其家幼精敏絕倫雙眸炯炯如電日讀
書積寸爲文雄邁醇深鄉人呼爲小韓子年十五六從

父宦游齊魯間覽周公孔子廟宅問陋巷舞雩所在慨然以爲彼七十子中顏閔未可幾及其餘若樊遲冉求輩使與之同時豈皆讓之但今世無孔子者出不得所依歸耳自是精思力踐進修不已弱冠從潛溪宋公游盡得其所學潛溪嘗欲甥之而不可亟稱其文名流老輩皆推讓弗及而先生方未視文藝恒以明王道闢異端爲己任嘗曰不以伊周之心事其君賊其君者也不以孔孟之學爲學賊其身者也謂道之於事無乎不在因列所當勉者爲二十一箴又作襍誠三十八章以自警謂化民必自正家始作宗儀九首家人箴一十五首

以告其族人謂先王之治先德教而後刑政作深慮十
道其言多先哲所未發又自悼空言浸多絕無自得之
味思一屏絕之而以顏曾所以自治者治其心爲日稍
久覺向時過缺愈衆其論靜則本於無欲謂能無欲雖
手執筆而耳聽訟口斷曲直而目察銖兩中之寂然者
未嘗少變也其論敬以撻而不失則內直內直則方外
者在是而聖人之天德可庶幾而至矣其論攻異端如
攻病當追求其本魁然鉅夫非自耗其元氣病何繇入
之善養生者當補元氣元氣旣完病卽易去耳聞者咸
以爲程朱復出嘗臥病絕糧家人以告笑曰古人有三

旬九食甑無儲粟者窮豈獨我哉洪武中以薦召至京
太祖見而異之使往見東宮錫之宴故欵所坐几以試
之先生必正乃坐上喜謂皇太子曰此莊士也當老其
才以輔汝試靈芝甘露論諭遣還家會讐家得罪獄詞
株連有司籍其家械送闕下上識其名特釋之使奉其
祖母挈其妻子家屬還鄉鄉人感發以爲盛事越五載
又以薦召至上方任名法爲治曰今非用孝孺時乃援
漢中府教授先生入蜀日與諸生講明聖學蜀獻王聘
爲世子師曰方先生古之賢者也先生初號遜志獻王
爲名其讀書之廬曰正學人因稱爲正學先生丙子典

應天府鄉試取中劉政等二百四十人建文帝立召爲翰林博士晉侍講學士侍經筵備顧問凡大政議輒咨之帝好讀書有疑必召使講解當臨朝臣僚奏事面決可否亦必命就晨前批答時修太祖實錄及類要諸書命爲總裁官靖難兵起日召謀議詔檄皆出其手燕兵渡淮及江畫策堅守誓死社稷預作絕命詞及燕師入城帝潛遜去宮中火起傳言帝崩卽杖衰經號哭闕下鎮撫伍雲執以獻文皇怒命繫獄猶遣人諭之再三不從姚廣孝計欲服天下請召之草卽位詔乃出之獄中及見悲慟徹殿陛文皇降榻勞曰先生何自苦余欲法

周公輔成王耳先生曰成王今何在文皇曰渠自焚死
先生曰成王卽不存何不立成王子文皇曰國賴長君
先生曰何不立成王之弟文皇曰朕家事先生何自苦
置之左右授筆札曰詔天下非先生草不可先生擲筆
於地大哭曰死卽死詔不可草文皇曰汝不顧九族矣
先生奮然曰殺我十族亦無若何且罵且哭文皇大怒
令以刀抉其口兩旁至耳割其舌磔之聚寶門外罵聲
不絕至死乃已年四十七門人廖鏞廖銘兄弟拾殘骸
瘞之聚寶山麓瘞畢而廖氏見收死之夫人鄭氏已先
縊遂誅其宗族親朋八百四十七人焚滅其先人墓毀

棄其文集詔天下有敢藏一字者罪必誅有溧水人魏

澤者以刑部尚書謫寧海典史匿其幼子於上海余氏

冒其姓方氏得不絕

魏澤字承恩有過方先生故居詩云荀與衡兩入侯城經過令人感

慨生黃鳥何人空百轉清猿墮淚只三聲山中自可全尚節天下難居是盛名卻憶令威千載後重歸華表不勝文皇每言及先生憤憤頓足不能平久之與近臣閒

論不覺心屈曰孝孺是箇忠臣仁廟亦謂羣臣曰方孝

孺輩皆忠臣也詔從寬典方氏遺族始有赦還鄉者因

立私祠祀之成化初遺文始行今所梓遜志齋集四十

卷是也寧海令郭紳實任梓事併新其祠萬曆初詔復

建文年號優卹殉難諸臣後有司始上言先生有遺裔

在雲間命錄之於是雲間亦立祠及崇禎末追謚曰文
正先生和粹貞亮天性忠孝年十三居母喪三年不肉
食父守濟寧被誣謫戍江浦上書請代不報潛溪塋葬
州自漢中走荆榛往祭墓且言之蜀王卹其孤發與王
紳林佑郭璿鄭居貞劉剛王琦鄭楷趙象葉見泰王叔
英許繼諸名士友善每以書往復切劘道誼聞風者莫
不興起斯道爲之復振蓋其學術源流于伊雒其文章
大類蘇氏而正論過之自三百年來論革除忠臣者必
以先生爲稱首而理學反以氣節掩雖說者或少其格
心之學應務之才與夫善死之道要之成仁取義立懦

廉頑正不以胡廣中庸易也近世已有議及文廡一席

者論定可俟矣所著述自遜志集外有周易枝詞周禮

考次目錄武王戒書注宋史要言帝王基命錄文統皆

以厲禁不傳

謝鍾傑贊曰我台之學考亭是師逮於愚菴實問而知愚菴之子是曰正學益擴而

弘上泝伊雒如麟在藪如星在辰旁觀一世絕類離倫潛溪之門盡天下士驚咤起立謂莫敢比心實希

聖自視欽然銘盤書紳襍誠惓惓家人有篤宗儀有紀謂道之行莫先於此學以氣充磅礴四行孰顧孰

忌禍福死生迄宋及元士氣益下有復古初不在作者愚按建文通臣題詩峨嵋亭有云一箇忠臣九

族缺全身遠害亦天常嘗論而細玩之則方正學先生之以上族死固非中道也然獨不得爲狂狷耶又

先生嘗言曾子子夏可以爲篤實而未至於光輝李谷平氏識之謂真是不知曾子似其所學尙粗未到

精處也然未得爲入室獨不得爲升堂耶祀之文廟當於振刷士氣匡扶人倫不爲無補或又以其凶死

周是修原名德以字行江西泰和人少孤貧值元季
亂奉母逃難苦行力學從游鄉先生胡渚樵以孫妻
之又從國子學錄蕭執受詩往反十餘載學成不仕
洪武末始舉明經授霍丘訓導高廟召問汝年幾何
對曰四十有四又問家居何爲對曰教人子弟讀書
爲善耳遂擢周府奉祠正建文初年有訴王府不法
者官屬皆下吏是修以嘗進諫獲免改衡府紀善預
修纂翰林數陳論國家大計及指斥用事者誤國用
事者怒衆共挫折之屹不爲動燕師旣渡江駐金川
門宮中悉自焚明日是修畱書其家別諸友人付以

後事晚具衣冠入應天府學拜先師畢爲贊繫帶上
自經於尊經閣下時壬午六月十五日年四十九御
史言其不順天命宜加追戮文皇曰彼食其祿自盡
其心置不問是修內貞外和孝友忠信非其義不苟
取襟懷坦明灑落而冲澹悠然其學自經史百氏下
至陰陽醫卜之說靡所不通爲文章未嘗締思援筆
立就而雍容雅贍詞理條達稍暇著述吟哦不虛寸
晷嘗曰忠臣不以得失爲憂故其言無不直貞女不
以死生爲慮故其行無不果取先代近世忠節遺事
輯爲一書名曰觀感錄朝夕省覽卒成其志居恒汲

汲誘導人善人有過失多爲之隱以是無少長貴賤
咸樂親之性知人所薦士如梁用之劉叔誌皆知名
當世初靖難兵急翰林諸人有與是修約同死義者
後皆負約惟是修如其言楊東里爲立傳且贊曰是
修之學雖間未純然於明綱常爲世道計必身履之
而不徒託之空言豈非卓然特立者歟蓋愧服之也
所著有詩小序詩集義詩譜三卷論語類編二卷廣
衍太極圖一卷綱常懿範十二卷邇言四卷家訓十
二卷又菑莪集進思集十餘卷藏於家崇禎末補謚

貞毅

卓敬字惟恭浙江瑞安人性孝且敏年十五讀書寶香山晨昏定省之禮雖遠不廢嘗風雨夜歸迷失道得一兒牛馮之歸比入門引燭放之乃黑虎也學成於天文地理律曆兵刑靡不究悉尤邃性理著書五十卷發明周子通書邵子皇極之蘊洪武戊辰登進士除給事中嘗言諸王服飾逾制宜早辭太祖笑而納之遷宗人府經歷進戶部侍郎建文帝卽位燕王來朝惟恭密奏曰燕王智慮絕人酷類先帝夫北平者強幹之地金元所繇興也宜徙封南昌以絕禍本夫萌而未動者幾也量時而爲者勢也勢非至勁莫

能斷幾非至明莫能察帝覽奏大驚袖之翌日召見
樹前曰燕王至親卿何得及此對曰楊廣隋文非父
子耶帝默然良久曰卿休矣事竟寢及燕師入京惟
恭不往迎首以奸黨捕至抗聲不遜下之獄文皇猶
憐其才使人諷之受官姚廣孝銜其素薄已力勸殺
之遂不屈而死臨刑從容歎曰變起宗親略無經畫
敬死有餘罪神色凜然經日猶如生遂誅三族所著
遺書詩文共一百卷門人購而藏之他日文皇嘗曰
國家養士三十年惟得一卓敬宣德間門人黃朝光
作年譜行狀後朝光子養正攜其小像併書至京求

傳侍講安福劉球爲作傳且以忠貞私謚之崇禎末
補謚忠貞

程本立字原道浙江崇德人少有大志讀書不事章
句與海鹽沈壽康友善壽康執手告曰世之學者爭
務科舉以經學爲名而無實吾所不取子之質近厚
年且富當志於聖賢之學自是篤志修檢聞金華朱
震亨兄弟得考亭正傳於許文懿公之門乃往從學
寓金華最久造詣益深更從同邑鮑恂貝瓊游資其
開發洪武丙辰舉明經秀才擢秦府引禮舍人改周
府晉長史丁卯從王來朝坐累謫雲南馬龍他郎甸

長官司吏目畱家大梁從一僕之任會死可伐煽誘
百蠻爲逆遂單騎入其巢諭降之是冬諸蠻復變西
平侯沐恩布政使張統其屬以兵事徧行各縣且撫
且禦遇民飢處卽便宜賑濟歷勞九載邊方晏然戊
寅建文帝立用薦徵入翰林預修高廟實錄尋擢僉
都御史作御史箴以自勵俸入外不通餽謁辛巳以
失誤陪祀改江西按察司副使未行聞燕兵入金川
門知事不競自經壬午六月十三日也越三日文皇
卽位詔追奪恩典家無遺貲人皆歎曰清御史所著
有吳隱集十卷藏於家後百三十年郡人福建布政

使吳昂刻行於閩邑人相與祀之學宮

愚按革除忠臣載建文業

編者不下二百人入金陵表忠祠亦百餘人茲錄
僅存其平素知學者數人非敢舉此廢彼凡以爲
吾道增光爲後儒立法云爾其間方先生不顧十
族死最剛周是修拜別先師死最正程原道自經
於燕師入京之頃死最忠王原案卓惟寅死雖不
同而各從容引罪死最忠皆所謂見危授命臨大
節而不可奪者也嗚呼謂非君子人與其方氏門
人之死而有傳者附列一二又以徵師友授受之
符焉或問他人不以學名而能死節者何如曰吾
夫子固言之矣志士仁人無求生以害仁有殺身
以成仁蓋志士得之至性仁人繇學而熟成功則
一未可以優劣論也第吾人不僅爲一節之死不
可爲卒然之死卽守死而或未必善其道然
則求其生死盡道者所貴豈不在學也與

胡子昭字仲常原名志高雲南大足人性方介富經
術遠游漢中從方遜志先生學蜀獻王知其賢賦詩

贈之以明經儒士薦爲榮縣訓導建文初擢翰林檢討轉山東按察僉事與叅政鐵鉉等誓死守濟南力禦燕兵出奇計擊走之軍聲大振以功晉刑部左侍郎壬午九月坐奸黨死臨刑詩曰兩間正氣歸泉壤一點丹心在帝鄉時年四十一父母年八十餘及子五人皆謫戍正德中巡按御史熊相立祠祀之濟南人作七忠祠位次第三崇禎末補謚介愍

林嘉猷原名昇以字行浙江寧海人與同邑鄭智行六千里至漢中求正學先生師焉方氏之門四方學者至無虛日而正學獨以得二子爲喜相勗以進於

聖賢之道曰匡我不及者二子也洪武丙子嘉猷以
儒士校文四川蜀獻王聞其賢與智同名至成都薦
爲府僚訝其名字不相符爲更名良顯建文初辟嘉
猷入史館爲編修智爲監察御史而嘉猷累遷陝西
按察僉事用忠節化民燕府嘗召入居處最久得二
郡王情素傾世子以告正學於是上遣錦衣千戶
張安持書詣燕許世子王燕燕內使王儼引見世子
計且得行世子竟先發事遂洩壬午六月內難平坐
方黨逮至京大慟謂僚友曰大丈夫見義勇爲九月
中遇害智字叔貞力學好古工文詞友嘉猷而師正

學以賢良舉當官吏事精敏持法不阿至是亦論死
初嘉猷事邑人王琦琦坐累家徙雲南姻族無一人
顧恤者獨徒步千里追送贈遺涕泣訣別人高其誼
卒死方氏之禍蓋始終義士也

俞貞木初名楨以字行別字有立南直吳縣人祖石
澗翁琰元末老儒邃易學著書百卷貞木少聰敏善
屬文年十五篤志問學欲以力追古人旣冠念學業
未成弗肯娶從永嘉陳公麟受易多所開悟及陳公
卒慈谿不遠千里復往卒業值元季兵亂始辭歸杜
門不出研精雋閩探奧義文居閒十餘年視天下榮

利泊如也洪武中始以薦授樂昌令尋丁父憂服闋
改都昌令甫下車卽捐俸倡修周元公朱文公祠因
以禮教其民翕然從化未幾政舉惠行郡將上其績
於朝丁母憂歸以親族犯法例弗起遂息交絕游屏
棄世故間作爲詩文以陶寫性情夙秉誠確之資潛
心爲己之學故其與人處雖甚和易而中峭厲不可
犯晚節益樂恬靜安陸姚善來守蘇郡折節下士數
延致於庠行乞言禮值靖難兵下勸善舉兵勤王文
皇旣立被逮至京以疾卒有遺集藏於家